


CUMEGN DA SALOUF

**REGLAMAIN PERTUTGONT
IGL CARAR CUN VEHICHELS
A MOTOR SEN LA VEIA D'ALP
DA DAVAINS E SEN LA VEIA
COMMUNALA DA DAFORA**



Scumond da carar **Art. 1**
Per igl traffic grev, camiuns e vehichels da societad exista en scumond da carar davent da vischnanca e davent dalla sbuccada dalla veia da Pulens ainten la veia d'alp.

Ena lubientscha excepziunala per vehichels sur 3,5 tonnas, tgi crodan sot art. 1, pò angal conceder la suprastanza communal, sen fundamaint da muteivs suffizaiants.

Art. 2
Sen la veia d'alp, davent digl parcadi a „Sars“, e sen la veia communal da Dafora, davent digl parcadi da „La Prada“, exista en scumond da carar per vehichels a motor, per motos e per velomotors (signal 2.14). Excepziuns tenor art. 3 e 4.

Excepziuns sainza lubientscha **Art. 3**
Liber dalla lubientscha excepziunala da carar èn:

- a) Viadis an sarvetsch dalla pulizeia, dalla sanitad, digls pumpiers per protecziun da fi e dad ieli (art. 5 alinea 1 dallas Ordinaziuns Executivas digl Cunsegl Grond, OECG, tar la Lescha federala davart igl Trafic Stradal, LTS // GAV z. SVG);
- b) Viadis fatgs, a caschung dad accidents, incendis u catastrofas, digls posts responsabels da cantung e cumegn, per purtar ageid. (art. 5 alinea 2 OECG tar LTS // GAV z. SVG);
- c) Viadis per adempleir incumbensas uffizialas e legalas (p.ex. igl igl scutgamegn, la protecziun da chemia ed incumbensos scu controladers da fi etc. scu er dertgiras per vistas ocularas);
- d) Viadis da medis e veterinaris per adempleir lour incumbensas professiunalas;
- e) Viadis an sarvetsch dalla confederaziun (art. 3 alinea 3 LTS // SVG);
- f) Viadis per dar tgira ad alps, gòts, pros e pastgiras;
- g) Viadis per transportar selvaschigna dad unglia fessa mazzada.

Excepziuns cun lubientscha **Art. 4**
Cun ena lubientscha èn igls sequents vehichels betg sottamess agl scumond da carar:

- a) Vehichels da persungas tgi ston contanscher lour domicil u lour affar per agens interess. (art. 10 al. 1 OECG tar LTS // GAV zum SVG);
- b) Vehichels da proprietaris da schaschant, lour genitours, unfants, beadis e fardagliungs, mers e locataris per igl access a lour schaschant;
- c) Vehichels da persungas da mastier tgi exequeschan lour pofessiun;
- d) Vehichels da persungas impedeidas da tgaminar;
- e) Vehichels impundias per scopos turistics. (per vacanzas u dimora dad en de).

Art. 5

Taxas

Lubientschas per igl onn u per emdas vignan angal concedeidas a persungas tgi totgan tar la grupa numnada sot art. 4 a) e b). Tottas ulteriouras persungas survignan angal ena lubientscha per emdas u deis.

Per lubientschas da carar vign pretendia las sequentas taxas:

- a) Lubientscha pigl onn, per vehichels anfignen 3,5 tonnas frs. 50.--
- b) Lubientscha per l'emda, per vehichles anfignen 3,5 tonnas frs. 20.--
- c) Lubientscha pigl de, per vehichels anfignen 3,5 tonnas frs. 10.--
- d) Lubientscha pigl onn, per motos frs. 20.--
- e) Lubientschas per vehichels sur 3,5 tonnas, per de frs. 25.--

Chestas taxas cumpeglian er la taxa per parcar sen igls parcadis publics e per parcar sen taragn public tar las aclas.

La lubientscha vign concedeida sen ena nomra da vehichel ed è betg transferibla, ella stò esser fixada bagn visibel davos la fanestra frontala.

Las lubientschas vignan emessas dalla canzleia communal. Per la spediziun per posta vign pretendia ena taxa.

Art. 6

**Prescripziuns
spezialas**

- a) Schi las relaziuns dallas veias e digl traffic èn precaras pò la suprastanza communal scumandar tot carar tenor art. 4 per taimp limito e / u restranscher igl carar sen tschertas categorias da vehichels.
- b) Barrieras fixas èn da sarar puspe siva da mintga passagi.
- c) Sen taragn cunfinont cun la veia dastga betg neir transitio.

- d) Contracts da fittanza, compras e barats da taragn, bietgs ed animals, tgi servan per untgeir las determinaziuns da chest reglamaint, vignan consideros scu abusivs ed adempleschan betg las premissas per retrer ena lubientscha.

Art. 7

Scumond da parcar

Gl'è scumando da parcar vehichels dad tot gener davent digl spartaveias da Lueras anfignen tigls parcadis uffizials da Sars e La Prada per lung la veia e sen taragn cunfinant. Excepziun fon igls parcadis signalisos e marcos. Igls cass numnos sot. art. 3 da chel reglamaint èn piglias or da chel scumond.

Art. 8

Taxas da parcadis

Per parcar vehichels sen igls parcadis uffizials pretenda igl cumegn digls possessours da vehichels ena taxa da frs. 5.-- pro 24 ouras.

Igl attest da parcadis stò neir retratg digl automat da parcadis a Lueras.

Ena carta da staschung per igls parcadis numnos pò neir retratga per frs. 30.-- tar la canzleia communal.

Igl attest da parcadis stò neir deponia bagn visibel davos la fanestra frontala.

Art. 9

Responsabladad

Tar donns ed accidents stat no igl proprietari dalla veia angal an igl rom dalla responsabladad da proprietaris dad ovras (art. 58 DO // OR).

Art. 10

Determinaziuns penals

Surpassamaints da chest reglamaint, an spezial l'inobservanza digl scumond da carar e parcar, son neir punias cun multas tgi vignan incassadas tenor proceder da multas disciplinaras.

Surpassamaints repetias vignan punias tenor igl proceder ordinari cun multas anfignen 1'000.00 frs.

Cunterfar allas determinaziuns digl art. 6 vign punia cun multas anfignen frs. 100.--, ed an cass da repetiziun anfignen frs. 1'000.--.

Abus dalla lubientscha pò aveir la consequenza tgi chella vign retratga temporarmaintg ni permanentamaintg.

Art. 11

Execuziun

L'execuziun da chest reglamaint è sottamess alla suprastanza communal. Ella pò incumbensar persungas privatas ni instituziuns cugl sarvetsch da procurar per urden e cun la funcziun da denunztgier. Talas persungas sa legitimeschan cun en documaint da legitimaziun.

Art. 12

Eir an vigour

Chesta lescha vo an vigour cura tgi igls signals da perscripziuns èn approvos digl departamaint cantunal da gisteia, siertad e sanidad e cura tgi igls signals correspondentes èn plazzos segls lias respectivs.

Art. 13

**Publicaziun e
signalisaziun**

Las excepziuns e las restricziuns digl traffic, decretadas cun chest reglamaint, èn da publitgier. La signalisaziun succeda an concordanza cun la pulizeia cantunala.

Cun la messa an vigour da chella lescha vignan annulladas determinaziuns dad oters decrets tgi stattan an cuntradicziun cun chella.

Approvo dalla radunanza communal digls 31 da mars 2008.

Igl mastral:

L'actuara:

Stefan Demarmels

Sandra Guetg